

«ТАСДИҚЛАНГАН»
“UzAssets investitsiya kompaniyasi” АЖ
Кузатув кенгаши мажлисининг
2023 йил 11 октябрдаги
4-сон баённомаси билан

“UzAssets investitsiya kompaniyasi”
акциядорлик жамиятининг
Коррупцияга қарши ички назорат тузилмаси
тўғрисида
НИЗОМ

Тошкент – 2023 йил

Мундарижа

I. Умумий қоидалар.....	2
II. Комплаенс ходими фаолиятини ташкил этиш.....	2
III. Комплаенс ходимининг асосий мақсади, вазифа ва функциялари	3
IV. Назорат тузилмасининг ҳуқуқ ва мажбуриятлари	6
V. Яқуний қоидалар	8

**“UzAssets investitsiya kompaniyasi” акциядорлик жамиятининг
Коррупцияга қарши ички назорат тузилмаси тўғрисида
НИЗОМ**

I. Умумий қоидалар

1. Ушбу Намунавий низом Ўзбекистон Республикаси Президентининг 2021 йил 6 июлдаги ПК-5177-сон “Коррупцияга қарши курашиш фаолиятини самарали ташкил этишга доир қўшимча чора-тадбирлар тўғрисида”ги Қарорига мувофиқ “UzAssets investitsiya kompaniyasi” акциядорлик жамияти (кейинги ўринларда – Жамият) **Коррупцияга қарши ички назорат тузилмаси – Коррупцияга қарши комплаенс бўйича масъул ходимининг** (кейинги ўринларда – Комплаенс ходими) фаолияти мақсади, вазифалари, функциялари, ҳуқуқ ва мажбуриятлари ҳамда унинг фаолиятини ташкил этиш тартибини белгилайди.

2. Комплаенс ходими ўз фаолиятида Ўзбекистон Республикасининг Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари ва қарорларига, Вазирлар Маҳкамасининг қарорларига, бошқа норматив-ҳуқуқий ҳужжатларга, Жамият бошқарув органлари қарорлари, буйруқлари ва топшириқларига, шунингдек ушбу Низомга амал қилади.

3. Комплаенс ходими Жамият фаолиятида коррупция ҳолатларини барвақт аниқлаш ва олдини олиш, уларнинг сабаб ва шарт-шароитларини бартараф этиш, манфаатлар тўқнашувига йўл қўймаслик ҳамда коррупцияга нисбатан муросасиз муносабатни шакллантириш чораларини кўришга масъул ҳисобланади.

II. Комплаенс ходими фаолиятини ташкил этиш

4. Комплаенс ходими ўз фаолиятида бевосита Жамият Бошқаруви раисига ва Кузатув кенгашининг Коррупцияга қарши курашиш ва этика қўмитасига бўйсунди.

5. Комплаенс ходими Жамият томонидан Ўзбекистон Республикаси Коррупцияга қарши курашиш агентлиги (кейинги ўринларда – ваколатли орган) билан келишилган ҳолда ишга қабул қилинади.

6. Комплаенс ходимини лавозимдан озод этиш масаласи ваколатли орган билан келишилади. Бунда, Жамият томонидан ваколатли органга Жамият Бошқарув раисининг Комплаенс ходимини лавозимидан озод этиш ҳақидаги тақдимномаси берилади.

Ушбу тақдимномада Комплаенс ходимини лавозимидан озод этиш сабаблари, мотивлари кўрсатилади. Тақдимномага Комплаенс ходимини лавозимидан озод этиш сабаблари ва мотивларини тасдиқловчи ҳужжатлар (масалан, ходимнинг аризаси, ички меҳнат тартиби қоидаларини бузганлигини кўрсатувчи маълумотлар ва бошқа шу каби ҳужжатлар) илова қилинади.

7. Ваколатли орган томонидан Комплаенс ходимини лавозимидан озод этиш сабаблари, мотивлари етарли эмас деб ҳисобланса, шу жумладан Комплаенс ходими таъқиб қилинаётганлиги ҳақида маълумотларга эга бўлса, ушбу масалада Комплаенс ходими билан суҳбат ўтказилиши мумкин.

8. Қуйидагилар Комплаенс ходимини лавозимидан озод этишни келишишни рад этиш учун асос бўлади:

Комплаенс ходимини лавозимидан озод этиш учун сабаблар етарли эмас деб топилганда;

Комплаенс ходимининг зиммасига юклатилган вазифа ва мажбуриятлар доирасидан ташқари вазифаларни бажармаганлиги ёки ўзига юклатилган вазифа ва мажбуриятларни бажарганлиги учун таъқиб қилинганлиги ҳолати аниқланганда.

9. Тақдим этилган ҳужжатлар ваколатли орган томонидан уч иш кун ичида кўриб чиқилиб, Жамиятга Комплаенс ходимини лавозимидан озод этишни келишиш ёки келишишнинг рад этилганлиги сабаблари кўрсатилган хат тақдим этилади.

III. Комплаенс ходимининг асосий мақсади, вазифа ва функциялари

10. Комплаенс ходимининг асосий мақсади Жамиятда коррупцияга қарши кураш бўйича ISO 37001:2016 халқаро стандарти талабларига жавоб берувчи комплекс тизимни, хусусан, коррупцияга қарши курашиш тизимини жорий этиш ва ривожлантириш, коррупциявий ҳолатларни барвақт аниқлаш ва уларнинг сабаб ва шарт-шароитларини бартараф этиш, коррупциявий хатти-ҳаракатлар содир этилишининг олдини олиш, Жамият ходимларида коррупцияга нисбатан муросасиз муносабатни шакллантириш мақсадида уларнинг ҳуқуқий онги ва маданиятини ошириш, Жамиятда коррупцияга қарши профилактик чора-тадбирларни ташкил этиш, коррупцияга қарши курашиш соҳасидаги ҳужжатлар ижросини таъминлашдан иборат.

11. Қуйидагилар Комплаенс ходимининг асосий вазифалари ҳисобланади:

Жамиятнинг коррупцияга қарши курашиш бўйича фаолиятини такомиллаштириш;

Жамиятда коррупцияга оид ҳуқуқбузарликларни профилактика қилиш ва уларга қарши курашиш;

Жамиятда коррупцияга қарши курашиш тизимининг самарали ишлашини таъминлаш ва назорат қилиш;

коррупцияга қарши курашиш бўйича фаолиятни амалга оширувчи ҳамда унда иштирок этувчи бошқа давлат органлари ва ташкилотлари билан ҳамкорликни олиб бориш.

12. Комплаенс ходими ўзига юклатилган вазифаларга мувофиқ қуйидаги функцияларни амалга оширади:

а) Жамиятнинг коррупцияга қарши курашиш бўйича фаолиятини такомиллаштириш соҳасида:

Жамиятда коррупцияга қарши курашиш бўйича чора-тадбирларни амалга оширишга қаратилган ички идоравий ҳужжатлар лойиҳаларини ишлаб чиқади;

Жамиятнинг коррупцияга қарши курашиш бўйича чора-тадбирларини ишлаб чиқади ва тасдиқлаш учун Жамият раҳбарига киритади;

Жамиятнинг фаолиятига оид норматив-ҳуқуқий ҳужжатлар ва ички идоравий ҳужжатларда аниқланган коррупциявий нормаларни бартараф қилиш бўйича таклифларни ишлаб чиқади;

Жамият томонидан ишлаб чиқиладиган коррупцияга қарши курашиш бўйича чора-тадбирлар лойиҳаларини Жамиятда коррупцияга қарши курашиш сиёсатига мослиги, мақбуллиги ва долзарблиги нуқтаи назаридан баҳолайди ва хулосалар беради;

Жамиятда коррупцияга қарши курашиш фаолиятини янада самарали ташкил этиш ва такомиллаштиришга қаратилган аниқ таклифларни ваколатли органга киритиб боради.

б) Жамиятда коррупцияга оид ҳуқуқбузарликларни профилактика қилиш ва уларга қарши курашиш соҳасида:

Жамиятда коррупциявий хавф-хатарларни баҳолайди, уларнинг натижалари бўйича аниқланган хавф-хатарларни камайтириш юзасидан чора-тадбирлар режаларини ишлаб чиқади ва Жамиятда коррупциявий хавф-хатари юқори бўлган лавозимлар рўйхатини яратади;

Жамият томонидан ўхшаш ҳуқуқбузарликлар содир этилиши эҳтимолини баҳолаш мақсадида давлат ҳокимиятининг бошқа органларида коррупциявий ҳуқуқбузарликлар содир этилишининг ҳолати ва йўналишлари ҳақида маълумот тўплайди;

махсус ахборот алоқа каналлари орқали Жамият ходимлари томонидан коррупциявий хавф-хатарлар ва ҳуқуқбузарликлар ҳақида келиб тушадиган мурожаатларни таҳлил қилади ва уларни белгиланган тартибда кўриб чиқирилишини таъминлайди;

Жамиятда юритиладиган хизмат текширувлари реестри ёки ўтказилган хизмат текширувларини рўйхатга оладиган бошқа тегишли ҳужжатда коррупция фактларига доир хизмат текширувлари бўйича маълумотларнинг тўғри ва тўлиқ акс эттириб борилишини назорат қилади;

давлат харидларини амалга оширишда манфаатлар тўқнашувини таҳлил қилишда ва Жамият билан шартномавий муносабатларга (меҳнат муносабатлари бундан мустасно) киришган ҳар қандай юридик ёки жисмоний шахсларнинг ишончлилигини текшириш жараёнида иштирок этади;

Жамият ходимларига коррупцияга қарши курашиш масалалари бўйича тушунтириш ва тавсиялар беради;

коррупция фактлари ҳақида хабар беришга мўлжалланган махсус ахборот алоқа каналларининг фаолият натижаларини таҳлил қилади ва таҳлилий материалларни Жамият ходимларига етказди;

Жамият фаолиятидаги коррупциявий ҳолатларни ва хавф-хатарларни аниқлаш мақсадида аҳоли ва ходимлар орасида сўровлар ўтказди;

коррупцияга қарши курашишга оид талаб ва нормаларнинг бузилиши масалалари бўйича интизомий жавобгарликка тортилаётган шахсларга жазо чораларининг мутаносиблиги ва етарлилигини назорат қилади;

коррупцияга қарши курашиш тизимини янада такомиллаштириш мақсадида Жамиятда коррупция фактлари юзасидан ўтказилган хизмат текширувлари натижалари ҳақидаги маълумотларни таҳлил қилади;

хар чоракда ва Жамият Бошқарув раиси талабига кўра, Жамиятда коррупцияга қарши курашиш бўйича амалга оширилган ишлар ҳамда улардаги коррупциявий ҳолат ҳақида Жамият Бошқарув раисига маълумот киритиб боради;

в) Жамиятда коррупцияга қарши курашиш тизимини самарали ишлашини таъминлаш ва назорат қилиш соҳасида:

коррупцияга қарши курашиш бўйича давлат дастурларида Жамиятга юклатилган вазифалар ижросини мониторинг қилади ва назоратини амалга оширади;

Жамиятда коррупцияга қарши курашиш тизимининг ISO 37001:2016 Коррупцияга қарши халқаро стандарти талабларига мослигини таъминлайди;

Жамият ходимларининг малакасини ошириш бўйича ўқув режаларининг коррупцияга қарши нормаларга оид қисмини ишлаб чиқишда иштирок этади;

Жамият ходимлари, шу жумладан коррупциявий хавф-хатари юқори бўлган лавозимлардаги ходимлар учун коррупцияни олдини олиш бўйича ўқув материалларини ишлаб чиқади;

ўқув режага мувофиқ Жамиятнинг барча ходимлари учун коррупцияга қарши курашиш бўйича тренинглар ўтказилишини ҳамда уларда ходимларнинг иштирок этишини назорат қилади;

Жамият ходимлари ва фуқаролар ўртасида коррупцияга қарши курашиш бўйича тарғибот тадбирларида иштирок этади;

Жамиятнинг расмий веб-сайтидаги “Коррупцияга қарши курашиш” бўлими ҳамда ижтимоий тармоқларидаги саҳифаларига жойлаштирилган маълумотларни янгиланиб борилишини таъминлайди;

Жамиятдаги ходимлар томонидан коррупцияга қарши курашиш соҳасидаги Ўзбекистон Республикасининг қонунчилигига ва Жамиятнинг коррупцияни олдини олиш ва унга қарши курашиш бўйича ички ҳужжатларига риоя қилинишини мониторинг ва назорат қилади;

Жамиятдаги коррупциявий хатти-ҳаракатлар бўйича хизмат текширувларини ўтказиш ташаббусини илгари суради ва унда иштирок этади;

одоб-ахлоқ комиссиялари томонидан манфаатлар тўқнашувини тартибга солиш бўйича қабул қилинган қарорларнинг холислиги ва мақбуллигини текширади;

амалга оширилган мониторинг, хизмат текширувлари ва назорат тадбирлари натижалари бўйича коррупцияга қарши курашиш тизимини такомиллаштириш юзасидан тавсиялар ишлаб чиқади;

Жамият ходимларининг ҳуқуқий саводхонлигини оширишга қаратилган конференциялар, учрашувлар, семинарлар, танловлар ва бошқа тадбирларни ташкил этишда иштирок этади;

Жамият фаолияти унинг коррупцияга қарши курашиш бўйича ички ҳужжатларига ҳамда халқаро стандартларга мувофиқлиги юзасидан текширувлар ўтказилади;

г) коррупцияга қарши курашиш бўйича фаолиятни амалга оширувчи ҳамда унда иштирок этувчи бошқа давлат органлари ва ташкилотлари билан ҳамкорликни олиб бориш соҳасида:

аҳолининг ҳуқуқий онги ва ҳуқуқий маданиятини юксалтиришга, жамиятда коррупцияга нисбатан муросасиз муносабатни шакллантиришга доир чора-тадбирларнинг ишлаб чиқилишида иштирок этади;

қонунчилик ҳужжатлари билан Жамият зиммасига юклатилган коррупцияга қарши курашиш бўйича вазифаларга мувофиқ хорижий давлатларнинг ваколатли органларига зарур ахборотни тақдим этиш тўғрисида сўровлар юборади ва уларнинг сўровларига жавоб беришда иштирок этади;

Жамиятнинг коррупцияга қарши курашиш чора-тадбирларини такомиллаштириш юзасидан хорижий мутахассисларни жалб этиш бўйича таклифлар ишлаб чиқади;

коррупциявий хатти-ҳаракатларни бартараф қилиш ёки коррупциявий жиноятларни тергов қилиш бўйича тадбирларни амалга оширишда ҳуқуқни муҳофаза қилувчи органлар билан ҳамкорлик қилади.

Комплаенс ходими қонунчилик ҳужжатларига мувофиқ бошқа функцияларни ҳам амалга оширади.

13. Комплаенс ходимига ушбу Низом ва бошқа қонунчилик ҳужжатларида назарда тутилмаган функцияларнинг юклатилишига йўл қўйилмайди.

IV. Назорат тузилмасининг ҳуқуқ ва мажбуриятлари

14. Комплаенс ходими ўз зиммасига юклатилган вазифалар ва функцияларни бажариш учун қуйидаги ҳуқуқларга эга:

Ўзи фаолият юритаётган Жамият ходимларидан уларнинг ваколатига кирувчи масалалар юзасидан таҳлилий материалларни, хулосаларни, статистик ва бошқа маълумотларни олиш;

хизмат мажбуриятларини бажариш доирасида Жамият ходимларидан зарур ёрдам сўраш ва олиш;

Жамият ходимлари фаолиятида аниқланган коррупциявий ҳуқуқбузарликлар юзасидан хизмат текширувларини ўтказиш;

Жамият Бошқарув раисига коррупцияга қарши курашиш тизимини такомиллаштириш бўйича таклифлар киритиш;

Жамиятнинг коррупцияга оид мажлисларида иштирок этиш;

текширувлар ўтказиш, ҳужжатларни талаб қилиш, ходимлардан ёзма тушунтиришлар олиш.

Комплаенс ходими қонунчилик ҳужжатларига мувофиқ бошқа ҳуқуқларга ҳам эга бўлиши мумкин.

15. Комплаенс ходими ўз зиммасига юклатилган вазифалар ва функцияларни бажариш учун қуйидаги мажбуриятларга эга:

ушбу Низом ва бошқа қонунчилик ҳужжатлари билан юклатилган функцияларни зарур даражада ва самарали бажариш;

қонунчилик ҳужжатлари талабларига қатъий риоя қилиш ва ўз ваколат доирасидан четга чиқмаслик;

Жамиятда жиноят аломатлари, хусусан коррупция ҳолатлари аниқланганлиги тўғрисида зудлик билан тўғридан-тўғри юқори турувчи орган, ваколатли орган ва бошқа ҳуқуқни муҳофаза қилувчи органларга хабар бериш;

Жамиятнинг коррупцияга қарши курашиш сиёсати, одоб-ахлоқ қоидаларининг коррупцияга оид қисмининг бузилганлиги факти юзасидан Жамият Бошқарув раисига маълумотномалар киритиш;

хар чоракда, кейинги чорак биринчи ойининг биринчи ўн кунлигида коррупцияга қарши курашиш борасида амалга оширилган ишлар ва чоратadbирлар тўғрисидаги чораклик ҳисоботни ваколатли органга тақдим этиш.

Комплаенс ходими қонунчилик ҳужжатларига мувофиқ бошқа мажбуриятларга ҳам эга бўлиши мумкин.

16. Комплаенс ходими Жамият ёки ваколатли орган томонидан ташкил этиладиган коррупцияга қарши курашиш соҳасида фаолият юритувчи ходимларга мўлжалланган ўқув курслари ёки махсус семинар-тренингларда иштирок этади.

17. Комплаенс ходими фаолиятининг натижадорлиги Жамиятда коррупцияга қарши курашиш тизимининг самарадорлик ва мақсадли кўрсаткичларига эришиш натижаларига асосан баҳоланади.

Комплаенс ходими фаолиятининг мақсадли кўрсаткичлари Жамият Бошқарув раиси томонидан тасдиқланади.

Комплаенс ходими фаоляти самарадорлигининг мақсадли кўрсаткичларига эришиш устидан назорат ваколатли орган томонидан амалга оширилади.

V. Якуний қоидалар

18. Ушбу Низом талабларини бузганликда айбдор деб топилган шахслар қонунчиликда белгиланган тартибда жавобгар бўлади.